



✙

**МОЛИТВЫ  
О  
ДЕТЯХ**

---

**ТЕБЕ ВРУЧАЮ  
ЧАДО МОЕ**



Сборник

**Молитвы о детях.**  
**Тебе вручаю чадо мое**

Православное издательство "Сатись"

2002

## **Сборник**

Молитвы о детях. Тебе вручаю чадо мое / Сборник —  
Православное издательство "Сатись", 2002

ISBN 978-5-7373-0234-4

Без молитвы, заступления Божия – не сохранить наших детей от искушений современного мира. Главным для родителей-христиан должно быть «... воспитание в ребенке живого члена воинствующей Церкви Христовой» (Н.Е. Пестов). В молитвослов вошли прошения и молитвы о посещении Божиим в радостях и печалях многотрудного дела воспитания детей и молитвы благодарения за Божие промысление о наших чадах.

ISBN 978-5-7373-0234-4

© Сборник, 2002  
© Православное издательство  
"Сатись", 2002

## Содержание

Молитвы о даровании детей	6
Молитва супругов о даровании детей	6
О праведных Захарии и Елисавете	7
Акафист святым и праведным Богоотцам Иоакиму и Анне	8
Личное прошение праведной Анны о даровании дитя[1]	15
О святых праведных Иоакиме и Анне	16
Личное прошение праведной Анны (в желании иметь дитя мужского пола)	17
Конец ознакомительного фрагмента.	25

# **Молитвы о детях. Тебе вручаю чадо мое**

По благословию Митрополита Санкт-Петербургского и Ладожского  
**ВЛАДИМИРА**



## Молитвы о даровании детей

### Молитва супругов о даровании детей

Услышь нас, Милосердный и Всемогущий Бже, да молением нашим ниспослана будет благодать Твоя. Будь милостив, Господи, к молитве нашей, вспомни закон Твой об умножении рода человеческого и будь милостивым Покровителем, да Твоею помощью сохранится Тобою же установленное. Ты властною силою Твоею из ничего все сотворил и положил начало всего в мире существующего – сотворил и человека по образу Своему и высокою тайною освятил союз супружества в предуказание тайны единения Христа с Церковью. Призри, Милосердный, на рабов Твоих сих (имена), союзом супружеским соединенных и умоляющих о Твоей помощи, да будет на них милость Твоя, да будут плодовиты и да увидят они сыны сынов своих даже до третьего и четвертого рода, и до желаемой старости доживут и войдут в Царство Небесное, чрез Господа нашего Иисуса Христа, Которому всякая слава, честь и поклонение подобает со Святым Духом во веки. Аминь.

*День памяти 5/18 сентября*

О святых угодницы Бжии, пророке Захарие и праведная Елисавето! Подвигом добрым подвижавшися на земли, восприяли есте на небесех венец правды, егоже уготовал есть Господь всем любящим Его. Темже взирающе на святый ваш образ, радуемся о преславнем скончании жительства вашего и чтим святую память вашу. Вы же, предстоя Престолу Бжию, примите моления наша и ко Всемилостивому Богу принесите, о еже простити нам всякое прегрешение и помощи нам стати противу кознем диавольским, да избавльшися от скорбей, болезней, бед и напастей и всякаго зла, благочестно и праведно проживем в нынешнем веке и сподобимся предстательством вашим, аще и недостойни есмы, видети благая на земли живых, славяще Единого во святых Своих славимаго Бога, Отца и Сына и Святаго Духа, ныне и во веки веков. Аминь.

## **О праведных Захарии и Елисавете**

Праведные супруги, «поступая по всем заповедям Господним беспорочно», страдали неплодием, что считалось в ветхозаветные времена наказанием Божиим. Получив весть от ангела о том, что жена родит сына, св. Захария усомнился в этом и был наказан немотой. Когда праведная Елисавета родила сына, его назвали Иоанном.

Пророк Захария был убит по повелению Ирода, через сорок дней скончалась и праведная Елисавета.

Праведным Захарии и Елисавете особо молятся о помощи в трудных родах и в супружеском неплодстве или бесчадии.

## **Акафист святым и праведным Богоотцам Иоакиму и Анне**

*День памяти 9/22 сентября*

### **Кондак 1**

Избранныи от человеческого рода прародителие Христовы, рождшии преблагословенную Богоотроковицу, из Нея же по плоти Сын Божий родися, святии и праведнии Богоотцы Иоакиме и Анно! Яко имущии дерзновение велие ко Христу Богу, и выну предстоящи престолу Его небесному, Тому прилежно молитесь от бед нам избавитися, да выну зовем вам: Радуйтесь святии и праведнии Богоотцы Иоакиме и Анно.

### **Икос 1**

Ангел предстатель послан бысть к вам от Бога, святии и праведнии Богоотцы Иоакиме и Анно, егда о бесплодии своем ов убо в пустыни, ова же в саду своем сетовасте, к Богу молитву возносяще и тако благовестие радостное принесе бесплотный, яко родити имате Дщерь Преблагословенную, о Ней же возблагословится весь род человеческий, с ним же и мы вам радостное приносим хваление:

Радуйтесь, корене Давидова стопроцветшия розги винограда животнаго;  
Радуйтесь, родшии Дщерь, от всех родов преблагословенную.  
Радуйтесь, воплощагося Сына Божия прародителие всечестнии;  
Радуйтесь, таинства от века утаеннаго проявителие всеизряднии;  
Радуйтесь, утехи израилевы ближайшии по плоти сродницы;  
Радуйтесь, обетованнаго миру Спасителя единокровнии южицы.  
Радуйтесь, святии и праведнии Богоотцы Иоакиме и Анно.

### **Кондак 2**

Видев себе святой Иоаким, во храме Иерусалимстем бесплодия ради от архиерея уничиженна, зело опечалися и в горести души своея в пустыню к своим стадом удалися, и тамо со многими слезами тепле ко Господу моляшеся, да сподобит его отцем своему чаду нарещися, и тако к молитве же пост прилагаше, и в сокрушении сердца Вседержителю Богу зываше: Аллилуиа.

### **Икос 2**

Силу горести мужа своего святая Анна уведевши, в дому своем сидящи, горце плакася и моляшеся ко Господу, да поношение бесплодия от нея отъимет. Мы же толикое терпение праведных поминающе воззовем:

Радуйтесь, Богоизбранная двоице, Единому от Троицы, Матерь по плоти породившая;  
Радуйтесь, Зиждителю вашему Родительницу непорочную произведшии.  
Радуйтесь, супрузи благословеннии, Преблагословенную в женах Дщерь воспитавшии;  
Радуйтесь, в бесплодии вашем от Господа услышании.  
Радуйтесь, яко слезныя молитвы ваша проникоша небо и во ушию Бога Израилева достигоша;

Рáдуйтесь, яко поношение ваше временное во славу вечную на небеси и на земли изменися.

Рáдуйтесь, святии и праведнии Богоотцѣ Иоакиме и Анно.

### Кондак 3

Силою Бѣжиею преисполнен, явися ангел Господень святому Иоакиму в пустыни и рече ему: услыша Бог молитву твою и изволи дати тебе благодать Свою, се бо жена твоя Анна зачнет, и породит тебе Дщерь, о Ней же всему миру будет радость: сия рек бесплотный, повеле ему ко храму Иерусалимскому паки отъидти, идеже он супругу свою молящюся обрящет, с нею же вкупе да воспоеет тамо хвалебную песнь Богу Израилеву: Аллилу́иа.

### Икос 3

Имущи скорбь велию в сердце своем, Анна святая, и в вертоград дома своего вшедши, виде гнездо птичье на древе сооружено, птенцы малыя в нем лежащия, абие моления к молениям прилагати потщася, да сподобит ю Гѣсподь мать чаду быти. И се явися ей ангел Господень глаголя: услышана есть молитва твоя и воздыхания твоя проидоша облаки, слезы же твоя пред Бѣга внидоша: се зачнеши и родиши Дщерь Препоблагословенную, о Ней же возблагословятся вся колена земная, и Тою дастся спасение всему миру, наречется же имя Ей Мария: таковое ангельское всерадостное благовещение поминающе воспоем Богоотцем таковыя;

Рáдуйтесь, супрузи праведнии, от Бѣга свыше предизбраннии;

Рáдуйтесь, во всех заповедех Господних без порока ходившии.

Рáдуйтесь, в скорби вашей временней утешение вечное получившии;

Рáдуйтесь, паче чаяния вашего десницею Бѣжиею превознесеннии.

Рáдуйтесь, яко во смиреннии вашем и скорби, помяну вы Гѣсподь;

Рáдуйтесь, яко сподобистесь прародителие Сыну Бѣжию быти.

Рáдуйтесь, святии и праведнии Богоотцѣ Иоакиме и Анно.

### Кондак 4

Бурею сомнения Иоаким праведный содержим и о благовестии ему ангела недоумевая, абие во град Иерусалим отъиде, идеже пред враты храма святую Анну обрете, Гѣспода вельми славословящую и радость ангельскаго явления и о чаде проречения ему возвещающую, тем же и о своем видении супружнице благовестив, вкупе с нею возопи ко Гѣсподу: Аллилу́иа.

### Икос 4

Слышавше сродницы и знаемии о преславном святыя Анны зачатии Бѣга Израилева славляху, Анна же богомудрая, плод чрева своего на служение Богу обрече, теплое благодарение Господеву возношаше, мы же светло всеславное зачатие Богоотроковицы Марии воспевающе, Тоя святым родителем глаголем сице:

Рáдуйтесь, радостнии нам грядущаго в мир Искупителя провозвестницы;

Рáдуйтесь, присно поминаемии чаемаго Спасителя праотцы.

Рáдуйтесь, чрез Дщерь вашу Благословенную, слову Бѣжию плоть взаимодавшии;

Рáдуйтесь, Бѣга воплощенна Внука себе нарицающии.

Рáдуйтесь, велией благочестия тайны достойнии служителие;

Рáдуйтесь, Бѣжия к человеку снисхождения всеизряднии посредницы.

Рáдуйтесь, святии и праведнии Богоотцы́ Иоакиме и Анно.

### **Кондак 5**

Богосветлую звезду явльшую Солнце правды Христá Бóга, Пресвятую Богородицу, плотию родити сподобистесь, и вожденное имя Богоотцев приясте Иоакиме и Анно всеблаженнии, о Ея же рождестве святем небо и земля возрадовашася, и весь род человеческий освятися, вопия дивному во святых Своих Богу Израилеву: Аллилу́иа.

### **Икос 5**

Видевше родителие от них родшуюся Богоотроковицу Марию, Зиждителиву же Мáтерь, яко кивоту Бóжию, благоговейно Той послужиша, темже и нас, к вам молитвенно припадающих, не отвратитесь, глаголющих:

Рáдуйтесь, в рождестве Богоотроковицы Марии светло возликовавшии;

Рáдуйтесь, видением Богоотроковицы услажденнии.

Рáдуйтесь, слышанием Ея умиленнии;

Рáдуйтесь, по сих от архиерея Бóжия благословеннии и ублаженнии.

Рáдуйтесь, Агницу Непорочную в дому своем добре упасшии;

Рáдуйтесь, Агнца и Пастыря Мáтерь во Дщерь себе приемшии.

Рáдуйтесь, святии и праведнии Богоотцы́ Иоакиме и Анно.

### **Кондак 6**

Проповедницы чудес Бóжих явистесь святии, егда обет свой Богови совершисте и трилетнюю Богоотроковицу Марию в храм Бóжий со славою введосте, да обитает тамо во Святая святых, о сих убо радостно Богу отец ваших славословия песнь воспевати потщастесь: Аллилу́иа.

### **Икос 6**

Воссия Богоотроковица яко луна полная в честнем Своем в храм Господень вхождении, Ея же чистоте ангелы удивляхуся, и архиерей Бóжий Захария прием Ю от рук ваших, святии Иоакиме и Анно, во внутренняя Святая святых с честью введе, яко воистину одушевленный Бóжий кивот, вас же по достоянию ублажи хваленьми таковыми:

Рáдуйтесь, радость всемирную роду человеческому породившии;

Рáдуйтесь, Виновницу человеческого обновления воспитавшии.

Рáдуйтесь, в храм Господень кивот одушевленный Бóжий приведшии;

Рáдуйтесь, Дщерь вашу Святую, во Святая святых вместившии.

Рáдуйтесь, Богу, воплотитися хотящему, сродницы являющиися;

Рáдуйтесь, ангелом собеседницы бывшии.

Рáдуйтесь, святии и праведнии Богоотцы́ Иоакиме и Анно.

### **Кондак 7**

Желание души твоя исполнив, и обет твой Богови воздав, Иоакиме преблаженне в старости добрей свято и праведно жизнь земную о Господе скончал еси. Тем же ныне Тому и о нас

сотвори молитву, да благую, мирную и непостыдную кончину получить сподобимся, зовуще Ему: Аллилу́иа.

### **Икос 7**

Новое и богоугодное житие во вдовстве твоём Анно святая, провождала еси у храма Божия приметающихся и Святых и Преподобнословенной Дщери твоей сослужащи, тем же яко истинную и богоугодную вдовицу, Христову же прабабу ты восхваляем, вкупе же и мужа твоего, Богоотца Иоакима, усердно чествуем и с любовью песни таковыя вам приносим:

Ра́дуйтеся, праведницы, их же правда яко солнце сияет во веки;  
Ра́дуйтеся, ангелом друзи, сожителie святым и приснии Богу.  
Ра́дуйтеся, ближнии Небеснаго престола предстоятелиe;  
Ра́дуйтеся, дерзновение велие ко Христу́ Богу имущеи.  
Ра́дуйтеся, церкви на Небеси торжествующия украшение;  
Ра́дуйтеся, церкви воинствующия на земли доброе заступление.  
Ра́дуйтеся, святии и праведнии Богоотцы́ Иоакиме и Анно.

### **Кондак 8**

Странствие земное совершив, святая и праведная Анно, на руках пребожественных твоей Дщери, Богородицы Марии, сном смертным почила еси и к Богу со упованием преставилася еси, тем же святое усение твое славяще, молим тя о богопраматерь всечестная, да егда и мы сном смертным усыпати начнем, умоли Спаса Христа́, кротко душу нашу от тела отделить и бесовския власти ю избавити, спасения же вечнаго нас удостоити, да зовем Ему в радости святых: Аллилу́иа.

### **Икос 8**

Весь мир христианский блажит вас по достоянию, святии и праведнии Богоотцы́ Иоакиме и Анно, и молитвенно ваша честная имена прославляет, Церковь же Христова светло память вашу празднует и песни хвалебныя вам приносит сице:

Ра́дуйтеся, светильницы мрак душ наших благодатно озаряющи;  
Ра́дуйтеся, от горних высот славы вашея к земнородным милостиво приницающи.  
Ра́дуйтеся, Богородице Марии сомолитвенницы всегдашнии;  
Ра́дуйтеся, Христа́ Б́га умиловителie многомощнии.  
Ра́дуйтеся, любовь и веру к вам имущеи от всяких бед спасающи;  
Ра́дуйтеся, молитвенно на помощь вас призывающих от напрасныя и наглыя смерти избавляющи.  
Ра́дуйтеся, святии и праведнии Богоотцы́ Иоакиме и Анно.

### **Кондак 9**

Вси ангели Божии и лица святых Божиих на небеси вас, святии и праведнии Богоотцы́ Иоакиме и Анно, целуют, роди же человечестии на земли молитвенными песнями вас похваляют и о предстательстве вашем благодарно вопиют Богу: Аллилу́иа.

## Икос 9

Витийства наша не довлеют к достойней вам похвале, святии прародителие Христовы: обаче вы, милостивы суще, и наша убогая хваления не отвратите, но будите о нас теплии предстателие и молитвенницы ко Господу, вашими святыми молитвами скудость душ наших восполняюще, да благодарственне вам зовем:

Рáдуйтеся, радости и славы вечныя вожделении нам ходатаи;

Рáдуйтеся, благ временных и вечных усерднии нам пред Господем ходатаи.

Рáдуйтеся, от смертоносныя язвы предстательством вашим верныя сохраняющии;

Рáдуйтеся, тлетворныя ветры молитвами вашими разгоняющии.

Рáдуйтеся, трясение земли и бури зельныя ходатайством вашим установляющии и в тишину прелагающии;

Рáдуйтеся, во всяких бедах и злключениях на помощь к нам ускоряющии.

Рáдуйтеся, святии и праведнии Богоотцы Иоакиме и Анно.

## Кондак 10

Спасения душевнаго желающим и о сем усердно подвижающимся, помощницы блазии святии и праведнии Богоотцы Иоакиме и Анно явистесе, ов убо иноком, ова же инокинем и хранители именуется, общее моление за всех верных Богу приносяще, да вси благодарственно зовут прославльшему вас во вселенней Царю Славы Христу: Аллилуиа.

## Икос 10

Стеною молитв ваших небесных, святии и праведнии Богоотцы Иоакиме и Анно, сохраняйте и ограждайте нас от искушений врага диавола, ищущаго душевней погибели нашей: вемы бо, вемы, яко много может молитва ваша пред лицом Христа Бога нашего, вашего же по плоти Внука, Его же умоляти не престаите о всех, с любовью вас почитающих и вопиющих:

Рáдуйтеся, маслина благоплодная, елей Мати Божией обильно нам источающая;

Рáдуйтеся, кипариси двое благосеннолиственнии, зной страстей наших в покои бесстрастия приводящии.

Рáдуйтеся, виссоне и багрянице, из них же скиния Божия селения соорудися;

Рáдуйтеся, горлицы единосупружнии, Голубицу Непорочную произведшии.

Рáдуйтеся, со Дщерию вашею, всех Царицею вечно царствующии;

Рáдуйтеся, в Сионе горнем в обители Ея небесней светлоторжествующии.

Рáдуйтеся, святии и праведнии Богоотцы Иоакиме и Анно.

## Кондак 11

Пение наше хвалебное милостивно примите, и щедрот ваших молитвенных нас не лишите, о, святии прародителие Христовы Иоакиме и Анно, аще и недостойнии есмы грехов ради наших, вашего святого заступления: обаче яко блази и всещедри суще, сие нам подадите, и помозите нам покаянием очиститися от скверны греховныя, да в чистоте сердец воспоем Создателю нашему хвалебную песнь: Аллилуиа.

## Икос 11

Светоподательныя два светильника, всемирную свещу возжегшия, познаим святых Богоотец Иоакима и Анну, о братие, и сиянием тех небесныя славы озаряеми, воспоем им таковыя:  
Рáдуйтєся, славнейшую без сравнения серафим воспитати удостоившиися;  
Рáдуйтєся, лучами благодати Божия осиянии.  
Рáдуйтєся, благоухания духовнаго преисполненнии;  
Рáдуйтєся, фимиам молитв ваших о всем мире христианстем Богу приносящи.  
Рáдуйтєся, с Богородицею Мариею и предтечею Иоанном у престола Христова выну предстоящи.  
Рáдуйтєся, святии и праведнии Богоотцы Иоакиме и Анно.

## Кондак 12

Благодать Божию и милость нам подати, прощение же грехов и исправления жития ниспослати просите нам у Господа, святии Богоотцы Иоакиме и Анно, и непрестайте о нас пред лицом Вседержителя Бога моляще, яко стяжавшии к Нему дерзновение многое. О сем усердно к вам припадающе, яко присных предстателей и заступников наших просим и благоумиленно зовем всех Творцу: Аллилуиа.

## Икос 12

Поюше многомощное предстательство ваше к Богу, Иоакиме и Анно праведнии, величаем возвеличившаго вас Христа Господа, воспоем и рожденную от вас Пренепорочную Его Матерь, вам же от усердия нашего сия достодолжныя похвалы приносим:  
Рáдуйтєся, от востока и до запада препрославленнии;  
Рáдуйтєся, стражие божественни неусыпно бдящи в молитвах к Богу о всех верных.  
Рáдуйтєся, помощь вашу благодатную всяцей душе христианстей подающи;  
Рáдуйтєся, во благих моления и прошения благочестивых исполняющи.  
Рáдуйтєся, душевных и телесных недугов преизряднии и безмезднии целители;  
Рáдуйтєся, благ временных и вечных всеусерднии и благоприятнии нам ходатаи.  
Рáдуйтєся, святии и праведнии Богоотцы Иоакиме и Анно.

## Кондак 13

Святии и праведнии Богоотцы Иоакиме и Анно! Молим вас со усердием и любовью, к подножию ног ваших припадающе: умолите Господа Бога, избавити нас от погибели вечныя грешником уготованныя, да милосердием Бога нашего спасаеми и вашими святыми молитвами поспешествуеми, благодарственно воспоем Ему ангельскую песнь: Аллилуиа.

*Этот кондак читается трижды, затем 1-й икос: «Ангел предстатель...» и 1-й кондак: «Избраннии от человеческого рода...».*

## Молитва

О приснославнии Христовы праведницы, святии богоотцы Иоакиме и Анно, предстоящи Небесному престолу Великаго Царя и велие дерзновение к Нему имущии, яко от Пребла-

гословенная Дщери ваша, Пречистая Богородица и Приснодевы Марии, воплотитися изволившему, к вам, яко многомошным предстателем и усердным о нас молитвенникам, прибегаем мы грешнии и недостойнии. Молите благодать Его, яко да отвратит от нас гнев Свой, по делом нашим праведно на ны движимый, и да бесчисленные прегрешения наша презрев, обратит нас на путь покаяния и на стезе заповедей своих да утвердит нас. Таже молитвами вашими в мире живот наш сохраните и во всех благих благое поспешение испросите, вся яже к животу и благочестию потребная нам от Бóга дарующе, от всяких напастей и бед и напрасныя смерти, предстательством вашим нас избавляюще, и от всех враг видимых и невидимых защищающе, яко да тихое и безмолвное житие поживем во всяком благочестии и чистоте, и тако в мире временное сие житие прешедше, в вечный достигнем покой, идеже вашим святым умолением, да сподобимся Небеснаго Царствия Христа́ Бóга нашего, Емуже со Отцем и Пресвятым Духом подобает всякая слава, честь и поклонение во веки веков. Аминь.

## **Личное прошение праведной Анны о даровании дитя<sup>1</sup>**

Горе мне, Господи! Кому я уподоблюсь? Ни птицам небесным, ни зверям земным: ибо и те приносят Тебе, Господи Боже, плод свой, я же одна неплодна. Увы мне, Господи! Я одна, грешная, лишена потомства.

Ты, Который даровал некогда Сарре в глубокой старости сына Исаака. Ты, Который отверз утробу Анны, матери пророка Твоего Самуила, призри ныне на меня и услыши молитвы мои. Прекрати печаль сердца моего и отверзи мою утробу, и меня, неплодную, соделай плодосною, дабы рожденное мною мы принесли Тебе в дар, благословляя, воспевая и прославляя Твое милосердие.

---

<sup>1</sup> Из Четых-Миней святителя Димитрия Ростовского.

## **О святых праведных Иоакиме и Анне**

До старости прожили в любви и благочестии, но так и не имели детей. Наконец, все отвернулись от них, так как бесчадие считалось позором в Израиле.

Тогда праведные Иоаким и Анна наложили на себя пост и усилили молитвы, и Ангел Господень явился им и возвестил о скором появлении ребенка. Вскоре у них родилась Дочь – Пречистая Дева Мария. Праведным Иоакиму и Анне молятся бездетные супруги, желающие иметь дитя.

## **Личное прошение праведной Анны (в желании иметь дитя мужского пола)**

*День памяти 30 августа/12 сентября*

### **Кондак 1**

Избранный угодниче Христов и чудотворче, преподобный отче Александре, воссиявый миру, яко звезда благосветлая, жития твоего добротой и множеством чудотворений, восхваляем тя любовью в песнях духовных: ты же, яко имеяй дерзновение ко Господу, молитвами твоими от всяких нас бед свободи, да зовем ти: Рáдуйся, преподобне Александре, Свирский чудотворче.

### **Икос 1**

Ангельский нрав имел еси, отче преподобне, и яко бесплотный, непорочно житие совершил еси на земли, дивный образ совершенства духовнаго нам оставив, да подражаем добродетелем твоим, и зовем ти сице:

Рáдуйся, благочестивых родителей плод благодаранный;  
Рáдуйся, неплодие рождших тя разрешивый.  
Рáдуйся, сетование их на радость преложивый;  
Рáдуйся, от пелен Богом избранный.  
Рáдуйся, от утробы матерней на службу Ему представленный;  
Рáдуйся, от юности Его единого всем сердцем возлюбивый.  
Рáдуйся, вся красная мира сего ни во чтоже вменивый;  
Рáдуйся, постом и бдением молитвенным плоть твою удручивый.  
Рáдуйся, непорочный сосуде Божия благодати;  
Рáдуйся, жилище Духа Святаго, украшенное чистотою.  
Рáдуйся, мужу желаний духовных;  
Рáдуйся, главо, освященная десницею Всевышняго.  
Рáдуйся, преподобне Александре, Свирский чудотворче.

### **Кондак 2**

Вида Господь душу твою, яко ниву благовозделанную к плодоносию духовному, от юности к исканию единого на потребу направи твой помысл, преподобне, темже любви ради Христовы, родителей твоих и дом отеческий оставил еси, и всякаго пристрастия суетнаго свободився, притекл еси в пустынную обитель Валаамскую на подвиги иноческия, зовый спасающему тя Богу: Аллилу́иа.

### **Икос 2**

Разумом Богопросвещенным постигл еси суету и непостоянство мира сего, в немже радость сменяется скорбью, благополучие же наветуется бедами нечаянными. Тёмже вечных нетленных благ возжелел еси, отче преподобне, и сия взыскати потщался еси отречением мирских благ и вольною нищетою, подвигая нас звати тебе:

Ра́дуйся, пустынного безмолвия любителю;  
Ра́дуйся, смирения и нестяжания рачителю.  
Ра́дуйся, истинного самоотвержения совершенный образе;  
Ра́дуйся, иноческого равноангельского жития всеизрядное явление.  
Ра́дуйся, правило веры и благочестия;  
Ра́дуйся, зеркало терпеливаго послушания.  
Ра́дуйся, безмолвие иноческое возлюбивый;  
Ра́дуйся, слезы духовныя стяжавый.  
Ра́дуйся, плачем временным блаженство вечное снискавый;  
Ра́дуйся, молитвами непрестанными прилоги вражия сокрушивый.  
Ра́дуйся, бдением и трудами плоть твою духови покоривый;  
Ра́дуйся, постом и воздержанием страсти укротивый.  
Ра́дуйся, преподобне Александре, Свирский чудотворче.

### **Кондак 3**

Силою Всевышняго осененный и укрепляемый, в иночестем пострижении власов главы твоея, все плотское мудрование отложил еси, преподобне, и яко воин благоискусный, схиму иноческую в броню спасения стяжав, и непобедимым оружием Креста Христова вооружився, крепко ратовал еси против врага невидимаго – диавола, смирением глубоким побеждая его вознесенную гордыню, и выну вопия ко Гóсподу: Аллилу́иа.

### **Икос 3**

Имея слез источник изобильный, угодниче Бóжий, и умиления велию благодать, хлеб твой слезами орошал еси, и питие плачем растворял, от преизбытка желания Бóжественнаго и любви ко Гóсподу.

Тёмже и мы ублажаем тя звании сими:  
Ра́дуйся, крепости и мужества тезоименитый подвижниче;  
Ра́дуйся, ангелоподобный человеце.  
Ра́дуйся, Царя Небеснаго воине добропобедный;  
Ра́дуйся, валаамския обители плод добрый.  
Ра́дуйся, пустынножителю благоприятный;  
Ра́дуйся, молитвенниче неусыпающий.  
Ра́дуйся, постниче изрядный;  
Ра́дуйся, безмолвниче дивный.  
Ра́дуйся, подвигом древних Богоносных отцев последователю;  
Ра́дуйся, их терпению и трудам подражателю.  
Ра́дуйся, благовременно могилу себе ископавый;  
Ра́дуйся, о смертнем часе непрестанно помышлявый.  
Ра́дуйся, преподобне Александре, Свирский чудотворче.

### **Кондак 4**

Буря искушений и устремлений диавольских не возможе поколебати храмины твоея душевныя, преподобне отче, основана бо бе на твердом камени веры во Христа, и хранима трезвением и молитвами непрестанными, имиже выну противоборствовал еси врагу спасения

человеческого, и непреткновенно восходил еси по стезям добродетелей к совершенству духовному в меру возраста Христова, воспевая Богу: Аллилуиа.

#### Икос 4

Слышав похваляема себе от человек, убоился еси превозношения суетнаго, отче Богомудре, и яко истинный смирения образ, умыслил еси убежати в пустыню неизведанную, на реку Свирь, на место свыше тебе указанное в видении чуднем, да тамо мирно и невозбранно единому Богу поработаеши, идеже мы сраем тя благохвалении сими:

Ра́дуйся, смирившагося до рабья зрака Христа́ Го́спода благий последователю;

Ра́дуйся, святых Его заповедей усердный исполнителю.

Ра́дуйся, девственниче душею и телом;

Ра́дуйся, трудолюбче нелицемерный.

Ра́дуйся, презревший славу человеческую суетную;

Ра́дуйся, сокрушивый сети тщеславия и гордыни.

Ра́дуйся, поправый высокоумия душевредную прелесть;

Ра́дуйся, усвоивый себе святое смирение Христово.

Ра́дуйся, исполнивший все обеты иночества;

Ра́дуйся, украсивыйся дарами благодати Божией.

Ра́дуйся, по благодати приемый власть на духи нечистыя;

Ра́дуйся, ни во чтоже вменивший тех устрашения и привидения.

Ра́дуйся, преподобне Александре, Свирский чудотворче.

#### Кондак 5

Светозарный луч озари в ночней темноте место пустынное, на немже вселитися пришел еси, преподобне, знаменуя собою светлость души твоея, и пламенеющее любовью ко Го́споду сердце твое, идеже благоприятно бысть Творцу твое произволение работати Ему в преподобии и святости, и пети Ему тамо хвалебную песнь: Аллилуиа.

#### Икос 5

Видевше ангельстии чинове равноангельское житие твое, отче Богоблаженне, смирения твоего глубину, молитвы неотступность, воздержания твердость и велию ревность духа твоего о чистоте, удивившася и прославиша человеколюбца Бо́га, укрепляющаго немощное естество человеческое. Мы же ублажаем тя и зовем:

Ра́дуйся, светильниче пустынный, просветивый страну корельскую сиянием твоих добродетелей;

Ра́дуйся, иночествующих дивное украшение.

Ра́дуйся, крине благоуханный пустыннаго прозябения;

Ра́дуйся, древо благоплодное небеснаго насаждения.

Ра́дуйся, возлюбивый благолепие дому Божия;

Ра́дуйся, в себе самом храм Триипостасному Божеству уготовивый.

Ра́дуйся, преподобием и правдою одеянный;

Ра́дуйся, союзом добродетелей удобренный.

Ра́дуйся, помазание приемый от Свята́го Ду́ха;

Ра́дуйся, освященный сосуде благодати Божией.

Ра́дуйся, рабе Христов, благий и верный;

Рáдуйся, слуго Господень истинный.  
Рáдуйся, преподобне Александре, Свирский чудотворче.

### Кондак 6

Проповедник подвигов твоих в пустыни Свирстей явился ловец зверей дивиих, иже гнав еленя в дубраве непроходимей, смотрением Божиим обрете храмину твою, преподобне отче: видев же тя во плоти ангела, знамение благодатного озарения на лице своем носяща, страха и радости исполнися, и припад к честным твоим стопам, во умилении сердца возопи Зиждителю Богу: Аллилу́иа.

### Икос 6

Воссиял еси в пустыни Свирстей Богосветлое светило, и на спасения стезю наставил еси многи души человеческия: яви бо тя Христос наставника и учителя иноком пустыннолюбивым, иже стекахуся к тебе, яко овцы к пастырю, могушу упасти их на пажити живоносней. Тёмже, яко сотворившаго и научившаго, чествуем тя сими похвальными словесы:

Рáдуйся, источниче Богодухновенных учений;  
Рáдуйся, хранилище изобильнаго умиления.  
Рáдуйся, одушевленные скрижали закона Господня;  
Рáдуйся, немолчный проповедниче Евангелиа Христо́ва.  
Рáдуйся, заповеди Господни исполнивый, и оным научивый учеников твоих;  
Рáдуйся, ленивых подвигнувый к исправлению твоими Христоподражательными нравами.  
Рáдуйся, немощных данною ти от Гóспода благодатию укрепивый;  
Рáдуйся, скорбящих сладостию твоих словес утешивый.  
Рáдуйся, грешных к покаянию направивый;  
Рáдуйся, юныя целомудривый.  
Рáдуйся, сострадания исполненный;  
Рáдуйся, в милости богатый.  
Рáдуйся, преподобне Александре, Свирский чудотворче.

### Кондак 7

Хотя человеколюбец Гóсподь прославити место подвигов твоих, отче, посла ангела Своего благовестити тебе, яко будет на месте том обитель иноком во спасение, и в ней храм во имя Святыя Троицы. Ты же явлением бесплотнаго просвещен, с радостным трепетом внимал еси благовестию небесному, зовый в смирении духа Владыще Ангелов и человеков: Аллилу́иа.

### Икос 7

Новое знамение благоволения Бóжия даровася тебе, Преподобне, егда безмолвствующу ти в избранной пустыни, в нощи свет велий облиста тя, и три мужа в одеждах светлых предсташа пред тобою, мир тебе дарующе и повелевающе, да устроиши тамо обитель иноческую, и в ней храм во имя Святыя Троицы. Дивяся убо сему пречудному в триех ангельских лицах Троическому явлению, зовем ти:

Рáдуйся: таинниче Пресвятыя и Единосущныя Троицы;  
Рáдуйся, самовидче неизреченнаго Бóжия явления.  
Рáдуйся, собеседниче светоносных ангельских сил;

Рáдуйся, созерцателю лучезарнаго Божественнаго видения.  
Рáдуйся, причастниче огнезрачнаго трисолнечнаго сияния;  
Рáдуйся, поклонниче Триипостаснаго Божества.  
Рáдуйся, в смертном телеси бессмертия зарею просвещенный;  
Рáдуйся, на земли небеснаго посещения удостоенный.  
Рáдуйся, смирением высокая стяжавый;  
Рáдуйся, нищетою богатую милость Господню улучивый.  
Рáдуйся, сеявый слезами радость присносущную;  
Рáдуйся, приемый исполнение обетований непреложных.  
Рáдуйся, преподобне Александре, Свирский чудотворче.

### Кондак 8

Страннолепно явился ти на воздухе ангел Господень в мантии и куколе иночестем, указуяй место, на немже храм во имя живоначальныя Троицы имел еси создати в пустыни Свирстей, преподобне отче, егоже Божиим послешением совершив и освятив, со ученики твоими немолчныя хвалы воссылал еси в нем Господеви, зовый: Аллилу́иа.

### Икос 8

Всего себе предав воле Господней, учениками твоими умоленный, священства благодать восприяти не уклонился еси, отче, аще и тужаше дух твой, ужасаяся высоты сея, но послушание явил еси духовным чадом твоим, подвизая их согласно звати тебе:

Рáдуйся, бескровныя жертвы достойный совершителю;  
Рáдуйся, алтаря Господня благоговейный служителю.  
Рáдуйся, преподобнеи руке твои со многим дерзновением к Гóсподу воздеявый;  
Рáдуйся, молитвы теплейшия от сердца чиста к престолу Вседержителя возносивый.  
Рáдуйся, образ благочестия бывый твоим учеником;  
Рáдуйся, мастию священства умащенная главо.  
Рáдуйся, вождю благоискусный воинов духовных;  
Рáдуйся, отче благомудрый общежития иноческаго.  
Рáдуйся, свеще, в молитве к Богу возженная;  
Рáдуйся, звезде, ко спасению путь верный показующая.  
Рáдуйся, маслино, елей милости Божией источившая;  
Рáдуйся, чаша, жаждущих учения спасительнаго напоившая.  
Рáдуйся, преподобне Александре, Свирский чудотворче.

### Кондак 9

Вси иноцы обители твоя в радостный трепет приидоша, егда устремление потока воднаго, на святую обитель твою движущееся, молитвою твоею укротил еси, и призыванием всеильнаго имене Иисус Христо́ва, бурному потоку тещи безвредно устроил еси на благою потребу иночествующих, еже видевши духовная чада твоя, всеумиленно возгласиша купно с тобою Богу: Аллилу́иа.

## Икос 9

Витийство человеческое не довлеет изрещи обилие радости духовныя, еюже преисполнился еси, отче Богоносне, егда во время молитвы твояе ношныя, явися ти Пресвятая Богородица с ликом чинов ангельских и обетовании непреложными душу твою возвесели, яко присная Заступница обители твояе будет, снабдевающи и покрывающы ю по вся дни.

Тёмже и мы сия радостная тебе приносим глаголы:  
Ра́дуйся, благоволением Богоматере осененный;  
Ра́дуйся, посещением Царицы Небесе и земли утешенный.  
Ра́дуйся, слышавый милостивыя от уст Ея глаголы;  
Ра́дуйся, приемый обетование крепкаго Ея твоей обители заступления.  
Ра́дуйся, любимиче Ея преискренний;  
Ра́дуйся, избранниче Сы́на Ея и Б́ога.  
Ра́дуйся, даром чудотворения облагодатствованный;  
Ра́дуйся, будущая, яко настоящая провидевый.  
Ра́дуйся, рыба́рем ловитву чудесно умноживый;  
Ра́дуйся, неплодным родителем чадородие даровавый.  
Ра́дуйся, болящия здравы восставивый;  
Ра́дуйся, тайная согрешения человеческия обличивый.  
Ра́дуйся, преподобне Александре, Свирский чудотворче.

## Кондак 10

Спасти хотя души ученик твоих, отечески назидал еси их, Богомудре, оваго словом, оваго примером жития твоего, с кротостию обличая, с любовию увещеая их преуспевати в благочестии и чистоте: наипаче же пред кончиною твоею, вся ко спасению душевному благопотребная заповедал еси им, и научил еси их в молитвах бодрствовать и немолчно пети Богу: Аллилу́иа.

## Икос 10

Стена заступления быша молитвы твоя, чудотворче святыи, всем с верою к тебе притекающим во всякой скорби, ибо чистоты ради твояе сердечныя, сила духовная от Б́ога тебе даровася, болящих исцеляти, бедствующим помогати, будущая прорицати, яко славити ближним и дальным величия Б́ожия, в тебе явленная, и звати тебе сице:

Ра́дуйся, недугов человеческих врачу немздоприемный;  
Ра́дуйся, не токмо телесных, но и душевных болезней целителю изрядный.  
Ра́дуйся, слепым прозрение даровавый;  
Ра́дуйся, сляченных и увечных здравы сотворивый.  
Ра́дуйся, бесных от диавольскаго удручения свободивый;  
Ра́дуйся, исступленным ум здравый возвративый.  
Ра́дуйся, покрытых струпами уврачевавый;  
Ра́дуйся, печальных утешивый.  
Ра́дуйся, бедствующим на помощь ускоривый;  
Ра́дуйся, плененным и в темнице сидящим ослабу и свободу явлением твоим даровавый.  
Ра́дуйся, преподобне Александре, Свирский чудотворче.

## Кондак 11

Пение всеумиленное принесл еси Пресвятей Троице во время кончины твоя, преподобне, и молитве сущей на устех твоих, предал еси святую душу твою в руке живаго Бѣга, Егоже от юности возлюбил еси, и Емуже до старости маститыя работал еси нелицемерно, темже со упованием благим радостно прешел еси к обителем небесным, со ангельскими лики пети триипостасному Богу: Аллилуѣа.

## Икос 11

Мирную кончину твою видевше твои ученицы, великий угодниче Бѣжий, скорбь разлучения с тобою утешением благодатным раствориша, в уповании всеильнаго предстательства твоего горе у престола Бѣжия, идеже слышиши с любовью тебе зовущих:

Рáдуйся, венец бессмертныя жизни от руки Вседержителя приемый;  
Рáдуйся, в чертозе небеснаго Домовладыки ликовствуй.  
Рáдуйся, откровенным лицом славу Трисияннаго Бѣжества созерцай;  
Рáдуйся, со старцы белоризными Творцу поклоняйся.  
Рáдуйся, всесветлаго Царствия Христова наследниче;  
Рáдуйся, Иерусалима горняго гражданине.  
Рáдуйся, небеснаго Сиона жителю;  
Рáдуйся, нерукотворенных скиний райских обитателю.  
Рáдуйся, по трудех временныя жизни, покой вечный получивый;  
Рáдуйся, блаженство, от века праведным уготованное, праведно восприявый.  
Рáдуйся, лучами невечерняго света свыше осиянный;  
Рáдуйся, долу величием чудес блистающий.  
Рáдуйся, преподобне Александре, Свирский чудотворче.

## Кондак 12

Благодати причастна явися священная рака, содержащая многоцелебная мощи твоя, чудотворче святой, ихже по летех мнозех яви Гѣсподь в недрах земных нетленными, исцеления неоскудно источающия, и всяк недуг врачующия силою Бѣга, дивнаго во святых Своих, дивно прославльшаго тя на небеси и на земли, Емуже воспеваем: Аллилуѣа.

## Икос 12

Поюще радостную песнь хвалы и благодарения человеколюбцу Богу, прославльшему тя в стране российстей чудотворца дивнаго и милостиваго, молим тя, преподобне отче наш: буди ходатай к Нему и молитвенник присный о нас, зовущих ти:

Рáдуйся, рода христианскаго заступниче;  
Рáдуйся, даров многоразличных сокровищница.  
Рáдуйся, покрове, Богом зданный;  
Рáдуйся, от Бѣга благодать исцелений восприявый.  
Рáдуйся, цвете нетления, благоухавый святую Церковь;  
Рáдуйся, заре бессмертия, от гроба преславно воссиявшая.  
Рáдуйся, щедрот и милования струя неиссякаемая;  
Рáдуйся, благоутробия источниче неоскудеваемый.

Рáдуйся, любве и сострадания явление многочудесное;  
Рáдуйся, телес наших благодарованное врачевание.  
Рáдуйся, о душах наших благоприятное предстательство;  
Рáдуйся, преподобне Александре, Свирский чудотворче.

### Кондак 13

О великий и преславный чудотворче, преподобне отче наш Александре! Милостиво прияв сие малое моление наше, молитвами твоими сохрани нас от недугов душевных и телесных в жизни сей, и от грядущих мучений вечных избави, и сподоби нас вкупе с тобою во Царствии Небеснем выну пети Богу: Аллилу́иа.

*Этот кондак читается трижды, затем икос 1-й «Ангельский нрав имел еси...» и кондак 1-й «Избранный угодниче Христов и чудотворче...».*

### Молитва

О священная главо, ангеле земный и человеке небесный, преподобне и Богоносне отче наш Александре, изрядный угодниче Пресвятыя и единосущныя Троицы, многия милости живущим во святей обители твоей и всем, с верою и любовию притекающим к тебе, являй! Испроси нам вся к житию сему временному благопотребная, паче же к вечному спасению нашему нужная: пособствуй предстательством твоим, угодниче Божий, да в мире глубоце пребудет святая православная Церковь Христова, и во благостроении зиждется царство (Его), во всяком благочестии нерушимо: буди всем нам, чудотворче святыи, во всякой скорби и обстоянии скорый помощник: наипаче же в час кончины наша явися нам заступник благосердный, да не предани будем на мытарствах воздушных власти злобнаго миродержца, но да сподобимся непреткновеннаго восхода во Царствие Небесное. Ей, отче, молитвенниче наш присный! Не посрами упования нашего, не презри смиренных молений наших, но присно о нас пред престолом живоначальныя Троицы предстательствуй, да сподобимся вкупе с тобою и со всеми святыми, аще и недостойны есмы, в селениях райских славити величие, благодать и милость единаго в Троице Бóга, Отца́ и Сы́на и Свята́го Ду́ха, во веки веков.

## **Конец ознакомительного фрагмента.**

Текст предоставлен ООО «ЛитРес».

Прочитайте эту книгу целиком, [купив полную легальную версию](#) на ЛитРес.

Безопасно оплатить книгу можно банковской картой Visa, MasterCard, Maestro, со счета мобильного телефона, с платежного терминала, в салоне МТС или Связной, через PayPal, WebMoney, Яндекс.Деньги, QIWI Кошелек, бонусными картами или другим удобным Вам способом.